

# Anc potenzial per perfecziunar il program

## Cussegl dal public SRG.R

■ (cp) Il tema central per il Cussegl dal public SRG.R è quest onn la midada da program da Radio Rumantsch (RR) e las emissiuns dal magazin «Cuntrasts». A chaschun da l'ultima seduta da quest onn ha il Cussegl dal public SRG.R dà danovamain bunas notas als responsabels da RTR Radiotelevisiun Svizra Rumantscha. Il facit per la perioda 2012 è fitg positiv. Il Cussegl dal public SRG.R ha er approvà il reglament per il Premi schurnalistic SRG.R per mauns da la suprastanza. La midada da program dal Radio Rumantsch è gartegiada. Il Cussegl dal public SRG.R è da l'avis che quest program saja frestg ed in accompagnament ideal per il minga di. Malgrà il resun positiv vesan ils responsabels potenzial per perfecziunar quest program. Adattaziuns èn previsas en il decurs da la primavaira 2013. Il program da radio duai daventar anc pli narrativ cun adattar singuls puncts da program. Ils resuns dal Cussegl durant la perioda 2012 gidan RTR a realisar il giaschà.

A chaschun da l'ultima seduta ha il Cussegl dal public SRG.R

era tematisà las emissiuns dal magazin «Cuntrasts» da la perioda suenter la stad fin la fin october 2012. Il Cussegl dat a RTR bunas notas er per l'ultima fasa d'observaziun. La emprim'emissiun da «Cuntrasts» pon ins mintgamai guardar la dumengia saira a las 17.25 sin SF1. La grupp da lavur considerescha ils temas sco bain elegids. Sulettamain l'emissiun «Vegl e cuntent» vegn crititgada. L'emissiun tractia memia pauc il tema da la vegliadetgna en singuls secturs e manchentia da dar ulteriuras infurmaziuns. Er crititgescha il Cussegl per part ils maletgs da la camera tar il discurs en il studio. Questas remartgas prendan ils responsabels encunter per optimar las proximas emissiuns e per la planisaziun 2013.

Il Cussegl ha plinavant approvà il reglament per il Premi schurnalistic SRG.R. Quest premi vegn surdà l'emprima giada la primavaira 2014 ed è dotà cun 6000 francs. A partir da lura surdat la SRG.R annualmain il premi per lavurs schurnalisticas da RTR da radio, televisiun e multimedia.

Ina giunta è sa participada ad in'observaziun communabla da

tut ils cussegls dal public da la SRG SSR ch'han tractà ils magazins da consumers. Il Cussegl dal public SRG.R ha tractà las emissiuns dal «Kassensturz» sin SF1 e da l'«Espresso» sin radio DRS1. Questas emissiuns èn vegnidas cumparegliadas cun emissiuns da las unitads d'interpresa da RSI e RTS. Plinavant ha la giunta guardà sche RTR reprendia ils temas dals magazins da consumers e rapportia da quels. Cun observaziuns communablas duai vegnir rinforzada e promovida la collavuraziun tranter las regiuns linguisticas.

A la proxima seduta dal Cussegl dal public SRG.R il favrer 2013 fan era part novas commembras e novs commembers. A chaschun da questa sesida vegn il Cussegl a sa constituir da nov cunquai che la vicepresidente ed actua, Chatrina Josty, sorta per la fin 2012. Medemamain sortan ulteriuras commembras ed ulteriurs commembers per motivs persunals u per via da la limitaziun dal temp d'uffizi. Il Cussegl ha er prendì cumià en sia ultima sesida dal president SRG.R partent, Duri Bezzola.